

每週經課朗誦經文（巴克禮台語漢字）2012/05/13

共同經課-1 使徒行傳十章四十四節～四十八節

44 彼得猶久啲講諸個話的時，聖神降臨佇見若聽道理的人。45 奉割禮的信徒，及彼得相及來的，因為聖神的賞賜亦降落佇外邦人，就攏奇怪；46 因為聽見 in 用諸個腔口啲講，閣謳啉上帝做大。47 彼得就應講：「諸個人已經受著聖神，親像咱一樣，是誰會禁得用水給 in 行洗禮啊？」48 就命令 in 佇耶穌基督的名受洗禮。對按呢請伊住幾若日。

共同經課-2 詩篇九十八篇

1 恁著向耶和華唱新的歌！因為伊曾行奇妙的事；伊的正手及伊聖的手骨已經為家已行拯救。2 耶和華互人知伊的拯救，佇列邦人的目矙前顯明伊的公義；3 伊記念伊對以色列家所發出的慈愛及信實。地的四角攏看見咱的上帝的拯救。4 全地攏著向耶和華出歡喜的聲；著出大聲，歡喜唱歌謳啉伊！5 著彈琴唱歌謳啉耶和華，著彈琴和詩歌的聲謳啉伊！6 用號頭及哨角的聲，佇君王耶和華的面前出歡喜的聲！7 願海及其中所充滿的攏著出大聲；世界及踎佇彼中間的亦著出聲。8 願大水拍手掌；願諸個山佇耶和華的面前出歡喜的聲；9 因為伊來欲審判全地。伊欲照公義審判世界，照伊的正直審判列邦。

共同經課-3 約翰壹書五章一節～六節

1 見若信耶穌做基督的，這是對上帝生的，閣見若疼生伊的，也疼對伊所生的。2 咱若疼上帝，閣守伊的命令，就咱對按呢知咱疼上帝的子兒。3 因為咱守上帝的命令，這就是疼上帝，閣伊的命令毋是重擔。4 因為見若對上帝生的，卡贏世間；也彼個所以會卡贏世間的，就是咱的信。5 卡贏世間的是是誰啊？豈毋是信耶穌做上帝的子的嗎？6 此個耶穌基督，是對水對血來的；毋若佇水，是佇水也佇血，

共同經課-4 約翰福音十五章九節～十七節

9 我有疼恁，親像父有疼我；恁著惦佇我的疼。10 恁若守我的誠命，就欲惦佇我的疼，親像我有守我的父的誠命，惦佇伊的疼。11 「我已經用諸個給恁講，欲互我的歡喜惦佇恁，亦互恁的歡喜滿滿。12 恁著相疼，親像我有疼恁；這是我的命令。13 人為著朋友獻生命，疼無有比此個卡大的。14 恁若行我所命令恁的，就是我的朋友。15 今了後，我無叫恁做奴僕，因為奴僕毋知伊的主人的所行。若是我已經叫恁做朋友；因為我對父所聽見的，攏有給恁講。16 毋是恁揀我，是我揀恁，閣設立恁，互恁去結果子，閣互恁的果子久長佇啲，互恁佇我的名，無論對父求甚麼，伊就互恁。17 我用諸個命令恁，是欲互恁相疼。」